


王忠文公集
八



王忠文公集

(八)

王 禕 撰

中華民國二十五年六月初版

撰者 王 禕

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

編主五雲玉

編初成集書雲

集 公 文 忠 王
冊 八

(本書校對者 董雲蓮 謝雨東 宮 沈抱秋 王 模秀)

王忠文公集卷十九

陳仲晉哀辭

仲晉、陳氏諱潛。仲晉其字也。其先趙州普甯人。五世祖忠。私諡茂行先生。四世祖安。贈資德大夫。在金嘗不仕。入國朝。至忠定公天祐。文忠公天祥兄弟。而仕乃顯。忠定、仲晉曾大父也。大父襲芍陂屯田萬戶。父思讓。晦德不耀。而從父思謙。今爲淮西肅政廉訪使。自屯田官于衛。因留居焉。故仲晉今家衛之龍游。仲晉少英俊。讀書善記誦。年十九。用例入國子學爲弟子員。既滿年。積分入優等。當釋褐授官。會丞相廣平王開監修國史府。仲晉見推擇爲掾史。及王罷相。遷掾史宣政院。亡何。宰相聞其才。擢中書省掾史。著令凡以布衣爲一品府掾者。悉歷九月。得七品官。或轉而掾中書出身。卽得官六品。于是仲晉歷月已通及八十。不幸遽得疾死。其死以至正十年某月日。得年三十有七。先是仲晉在宣政。從帝師至五臺山。風土不宜。因感羸疾。明年入京師。扈駕上京。往來勞動。感疾益深。既還京師。疾少間。宰臣趨起治事。而仲晉所掌有重獄。獄成。抱具獄稟堂上。自朝及夕。力不能堪。歸就寓舍。疾增劇。遂以不起。仲晉操廉介。家素貧。又久病。旣死。囊無留貲。中書援故事。給錢爲賻。同舍生又相與合錢。始克買棺以斂。而返柩南方。嗚呼。是可哀也已。始予識仲晉錢唐。一見如平生歡。厥後同客京師。情好尤篤。每相見。輒竟日談論。傾盡底裏。誼

若骨肉然。然仲晉爲人。倜儻不立崖岸。其與人交皆然。非于予獨然也。今年春。予將南還。往別仲晉。怪其形神消耗已甚。爲之怵然。心固憂其必死。南還未幾。則聞仲晉果死矣。夫以仲晉之才之美。使有所就。以行其志。固亦何媿。而天者使之止于若此。嗚呼。是誠可哀也已。仲晉無丈夫子。有弟濬。仲深亦與予善。因爲哀辭以寄予哀。以慰仲晉。且遣仲深云。詞曰。

噫嗟仲晉歸來兮。衡之上水清土且溫。子家三世居此兮。有屋并有墳。有親在堂。望子顯榮兮。及其身。子今死矣。孰繼爾後。奉二親。人孰不有死兮。哀子之死良可歎。爾居甚良兮。九軌之涂。摧爾輶。爾壁有藉兮。楊襲旣備。乃棄捐。方輿而享。遽闕以折兮。彼天胡不仁。匪天不仁兮。窮達壽夭。繫于命。宰臣卹爾。友朋念爾。贈金孔多兮。返子之柩。衡之濱。子宜有知兮。順爾之命。心無冤。噫嗟仲晉歸來兮。爾家有屋有墳。安爾神。

王處士哀辭

遂昌有隱君子曰樂天處士王君鑑翁。字子明。性資粹夷。風裁雋茂。外冲遜而無累。內淵廓而有容。秉操尙乎剛貞。殖學務于敦實。蓄志蘊業。弗徇于功名。闕蹟銷聲。甘老於邱壑。終始一節。蔚乎可觀。初君之太父。嘗創義塾。淑其里閭。仁厚之澤。流衍無斁。及君益繼先志。務推惠利。以及一鄉。凡鄉之人。服其言行。事有不斷。必求直于君。得其片言。無不悔愧。母氏遘疾。藥弗能效。君露禱北辰。剖股和糜而進之。疾以遂瘳。

幼失所怙。季兄教育之甚至。君事之猶事父也。其孝友著于家庭。信義化于鄉里。大抵此類。夷考其行。可謂有德之君子已。君之卒也。二子滋浚。能以禮葬。太史宋濂氏實爲之銘。而浚復徵言于禕。惟昔眉山蘇明允卒。其子軾。輟旣請銘于歐陽公。又屬其友曾公鞏爲之詞。曰。銘以納之壙中。詞以表之墓上也。諱於浚爲友。誼弗敢讓。乃爲詞以哀之。其世系行業之詳。已具于銘者。弗復道也。詞曰。

括蒼之山。沓嶂複嶺。摩蒼穹。蜿蜒磅礴。孕靈蓄和粹以融。抽英拔精。良金勁鐵。礦在鎔。少微垂象。晶采靈翕。上下通光。氣膠葛。厥生偉人居其中。猗處士君。產才甚數。器甚豐。神完志暢。維內剛直外謙沖。抑遏不振。匪世不用時不逢。闕全葆真。以樂其天。樂其窮。旣孝以友。旣信以義。達家邦。是亦爲政。豈必智名并勇功。繫古之人大邱。少室將無同。軌世範俗。庶幾永遠承休風。期頤未迄。胡爲一疾遽長終。嗟鄉之人。懷仁戀德。誰適從。白雲寥寥。青山寂寂。儀刑空。嗚呼悲乎。詞不多薦哀悃。

汪元明哀辭

嗚呼元明。諱祀。汪姓。世居金華。予友也。年四十有八。不幸以至正十二年二月十八日得疾死。元明長予十七年。予年十九時。識元明。一見卽定爲忘年交。時予方銳于爲文。元明輒語之曰。以子之才。當有所就。然涵養之功未至。文不可以徒爲。予竊心服其言而不能從也。自從予出走四方。不及與元明常相會。卽會則必彼此以文字絮長較短。各盡言乃已。於是予將藉元明爲益友以底于成。而孰謂其遽止於斯也。

嗚呼。予觀士之窮。無如元明矣。元明幼孤貧。無以自存。異流賤技。業之以爲食。既乃重自激厲。刻苦問學。業成。遂開門授徒。用其束修之入。爲歲計。而其弟貧尤甚。元明有所入。必分給之。且身爲邢氏贅壻。邢氏之老。皆仰之食。平居糲粥或不繼。而元明處之常晏然。既死。家無一錢。凡棺與葬事。皆朋友事之。有男生。始再期。朋友又爲賣其所有山。得錢買田五畝。畀其妻以爲贍。嗚呼。士之窮。無有如吾元明者矣。始元明受經于文懿許先生。人固已知元明。其後復奉書贊。今侍講黃公。故修撰張公。而游其門。及待制余公。持憲節浙東。見元明所爲文。尤加獎譽。由是元明名聞薦紳間。求文者多之。元明而元明亦喜于自見。因以發其素所蘊蓄。然亦頗用是自負。與人辨論。必如其說。乃已。稍不合。則形諸色辭。而其所以自負者。人或莫能知也。蓋維其修之勤。故其文有以著於人。見之確。故其說無以詘於人。人之知元明者。望之甚重。而孰謂其遽止於斯也。嗚呼。士之窮。無如元明。而能卓然自立。以表見于世。亦無如元明矣。予既傷元明之窮于前。又懼其泯沒于後也。作辭以哀之。辭曰。

維窮則亨兮。天理之常。何君之生兮。乃卒于窮。伊世之人兮。莫不有逢。官爵榮顯兮。寶物又豐。車馬衆多兮。食有牛羊。姬侍列屋兮。子孫滿堂。雍容歡忻兮。既壽且康。彼何人斯兮。享茲福慶。何君之窮兮。曾不少享。妻孥飢餓兮。腹或不充。志願坎壈兮。終身遑遑。曰道爲華兮。學以爲榮。文章孔有兮。又有名聲。身則雖窮兮。其存者長。卽此較彼兮。彼有糝糠。造物之施兮。孰謂不平。嗚呼哀哉兮。君則旣亡。朋友遲君兮。嗟君

不揚。交游零落兮。我將焉從。雙溪之水兮。其流湯湯。人之思君兮。曷其有忘。

衛處士誄詞

維至正十四年四月九日。華亭衛處士諱德嘉。字立禮。卒。享年六十有八。以卒之月二十九日。葬集賢鄉余山之原。處士之卒也。先一月。語其二子曰。死生晝夜之道。吾所素聞。四月九日之夕。吾其逝矣。已而果然。鄉里之人。無賢不肖。皆爲之咨嗟流涕。曰。處士厚德之君子也。今亡矣乎。蓋處士生于名家。負其淑質。有溫恭之德。有周通之才。而重自葆闕。不樂仕進。初左丞郝公。嘗見推擇。辟充從事。宜慰羅公。復加薦舉。署儒學官。皆以養親辭不就。厥後都水任公。其外舅也。俾居列曹掾。則曰。仕而得祿。以爲養也。今吾親已矣。猶爲是乎。於是蘊材懷德。不復施用。躬其文獻。上趾美於先世。充其基業。下垂裕于後昆。善始善終。隱然爲鄉邦之望。孔子所謂吉人。孟子所謂善士。處士有之。嗚呼。如處士者。其誠厚德之君子矣。處士生旣不有爵位。歿苟無以振其幽。爲善之徒。將曷知勸。是用序述其私。爲之誄焉。詞曰。

衛以國氏。其宗蟬聯。華亭之支。由汴來遷。始遷伊誰。自宋建炎。其諱曰僑。實爲王官。子曰宗武。繼踵高齋。躋階朝散。分符外藩。朝散有子。是之謂謙。象數之學。造于微玄。際今熙朝。世祿益延。別駕永嘉。仍有譽聞。衍休委祉。承乏宜賢。是生處士。餘慶之綿。猗歟處士。毓秀名門。厚質岐嶷。淑姿粹醇。六藝之書。百氏之言。咀其英華。闡其根源。旁搜博覽。旣肆以涵。不託詞章。巧爲雕鐫。反諸其身。厥德乃完。內方以正。敬而能嚴。

外和而周。弗徇以偏。無瑕之玉。匪刻匪剜。至和之音。不濫不洩。推之于家。有倫粲然。孝以事親。敬以奉先。晨昏溫清。時其旨甘。歲時祭祀。哀思致虔。夫婦之際。閨門之間。肅焉如賓。執禮不愆。友于二季。篤其愛恩。鞠育從子。教之成人。益廣厥施。以庇宗姻。又推于鄉。惠澤維均。適時浚菑。大札大禡。不遺餘力。以恤厄艱。穆乎其義。藹乎其仁。仁風義聲。洋洋以傳。撼于鄉邦。薰襲里閭。維是處士。維德之純。親身操行。勉勉循循。不愧于天。無歉于心。萬室之邑。同所觀瞻。視如蒼龜。如邦之翰。善類所依。謂將百年。儵其淪亡。孰不痛酸。嗚呼哀哉。君子之德。自昔爲難。而況于今。俗偷益僨。夸毗成習。奪利攘權。不有君子。孰矯而敦。嗚呼處士。三代之民。今則已矣。休微曷泯。誅行謀謚。古道所遵。私述梗槩。我言用陳。凡百同志。尙鑒斯文。

務光先生張君誄詞

古之君子。出而用世。則天下被兼善之澤。處而立言。則後世蒙嘉惠之私。其操雖殊。其志則一。皆所以究心而信道。及物以爲仁者也。有若臨海務光先生張君。殖學厚深。秉志貞亮。攬儒林之英秀。擧藝圃之芳華。自其壯年。有意當世。會詔求直言。時丁多故。爰采家國之利病。酌古今之權宜。撰爲政事書。將詣于朝廷。獻諸君宰。而事不果行。志弗能究。遂乃居鄉闡教。開門授徒。執業者皆英才。講經者無虛日。蓋其學術。一本於伊洛。而上達于洙泗。純而不雜。信而有徵。于是推其躬行心得之緒餘。託諸毫分縷析之章句。所著有言志錄。六藝編。世運略等書。凡三十八篇。皆辨理精詳。論事明暢。鄙王通續經之僭。陋揚雄守玄之

議誠足以自成一家。永垂千載者也。嗚呼！先生執德不回。雖齟齬於當世。而立言不朽。實惠利於後來。謂其無愧于古君子。非歟。維昔學士大夫之歿。禮貴飭終。請諡謀諫。厥有彝典。先生之卒。學者既因其所自號。稱之曰務光。而諫未有辭。無以較實揚微。在禮爲闕。是用追述而補陳之。其辭曰。

嗚呼先生。實古君子。制心維敬。飭身維禮。學苑揚翹。儒林振鐸。卓操世模。貞猷俗軌。志雖當世。義甯苟仕。鍾采弗耀。韜鋒自蔽。鄉邦歸重。君公遜燉。有來學徒。教被時雨。業崇六藝。術廣百氏。爰茂道譽。益隆德履。理絲意融。行自躬體。推其緒餘。託以言語。擗撫遺經。羅網軼史。發擿祕要。抉剔微旨。著爲羣書。戶列門時。絕編雖歎。續經非僣。勒成一家。垂示千禩。先哲是迓。後聖其俟。嗚呼先生。厥就愈偉。嗟世之人。其孰無死。死有不朽。立言之建。令聞長世。其曷窮已。嗚呼先生。今則已矣。易簀全歸。蓋棺正斃。儀刑旋遯。嘉惠猶修。後生晚出。將孰憑倚。藹焉教思。匪文無紀。以濯其潛。以焯其煒。庶無愧辭。敬薦哀詠。

諭龍文

東陽縣西鄙有石潭。在崇山上。相傳有龍居焉。凡蛇虺龍黿蜥蜴之出其間者。人皆謂爲龍也。至正十三年夏。大旱。縣民相與詣潭下祈焉。有頃而龍見。既見而不雨。自若也。烏傷王禕曰。物之有知者。宜莫靈于龍。龍之靈。爲其能雨也。龍弗能雨。則失其職。無取其爲靈矣。予哀斯民之無所訴。而龍之失職莫之靈。爲可罪也。爲文使投諸潭。以諭之。龍如有知。其尙有激也。文曰。

維民之生兮。命縣于天。天之生民兮。食以爲先。雨澤或時兮。歲乃有年。年之弗登兮。民食則艱。今茲之旱兮。誰實使然。我究厥繇兮。豈龍之愆。伊龍之靈兮。神變化乎玄間。憑陵乎八區兮。奮迅乎九淵。飛廉爲御兮。挾豐隆使後先。雨天下曾不崇朝兮。功莫可以名言。今茲之旱兮。寧爾龍之弗聞。雖聞而不雨兮。亦獨何心。芃芃者苗兮。徧于郊原。民口嗷嗷兮。食之所存。枯槁就盡兮。日化爲塵。大命近止兮。哀我斯民。上帝好生兮。冒下維仁。至仁所被兮。生意畢臻。天札疾癘兮。詎輒加此下人。爾龍胡爲兮。視民如冤。逆拒帝命兮。使壅閼而弗申。以忍自持兮。怠以自安。赫赫上帝兮。厥鑒孔明。如或知爾兮。將大罰于必行。天怒人怨兮。叢于爾身。爾龍誠靈兮。盍悔于今。

祭胡侍郎文

維至正十二年歲次壬辰三月乙巳朔越十有五日己未里中子王藻傳時中王禕陳友孚等謹以清酌庶羞之奠致祭于宋故兵部侍郎致仕胡公之墓曰公當宋初顯擢科第娶有進士實公始之十握州符六持使簡選曹計省無弗踐馭晚以從官全身而退有功有德大芘斯人歿爲明神光靈烜赫兩浙之境廟貌相望家祝戶祠罔閒遐邇矧維錢唐公昔所守是窀是窆體魄攸歸兆域歸然孰不愛護嗟人拜掃歲有彝典屬茲寒食集于墓下薄陳一奠式表慕思惟公有靈益芘鄉梓歷年綿代來瞻來崇尙鑒

祭黃侍講先生文

維至正十七年歲次丁酉閏九月壬寅朔越十有七日戊午門人金涓屠性宋濂王禕朱濂傅藻等謹以清酌庶羞之奠致祭于元故侍講修史先生黃公之靈嗚呼人物文章有盛有衰其所關繫意者天則使然非人力所能爲昔在唐宋韓歐之出實當其盛時時則劉柳蘇曾相承並起有以聳當世文治之巍巍及其既歿文章遂卑而君子於此亦以驗其世運之推移惟國家之興隆元氣混合三光五嶽結粹而凝輝鍾爲人物著於文章律倡呂和規重矩疊莫盛與之夷然當至元大德之世龐儒碩生布列于朝廷者大抵皆前代之遺祖宗作人爲日既久逮乎延祐設科取士而得人之盛遂及于今茲公當其時奮乎東南褒然舉首文名赫然而四馳歷仕外服晚乃登巖典冑監領儒臺學者翕然而宗師當代文章之柄咸公是屬而公亦不得以苟辭肆今皇上崇尚儒術慨念老成有足倚毗幸公之獨在爰起公於既老用公於未衰掌制玉堂勸講經帷任尊而職邇將倚以爲王猷之輔轍國論之耆龜天下仰之如韓歐謂朝廷爲有人士類爲有依公不久留控辭而歸出處進退卓然而無疵公今歿矣一代之人物文章于是盡矣非天其孰使之切嘗論公學博而操則約力宏而造則微統壹聖真融貫理奧不大聲色任斯道而委蛇故其形於文章譬如周廷重器圭璧鼎敦分置羅列蓄光采而嚴等威又如漢廷老吏持法精謹引經博古以斷獄而決疑性靈以之而發舒造化以之而補裨聖賢經傳以之而羽翼古今事理以之而綱維公之名世者人皆知其出此抑所以致此者固夫人之莫知嗟公已不可復作斯文之未喪者幾希昔歐陽

子之歿也。臨川王公以謂生有聞于當時。死有傳于後世。苟能如此足矣。而亦又何悲。今公之有以不朽。誠亦無憾。而吾黨小子。傷悼摧痛。不能已於言者。又眉山蘇公所謂上爲天下慟。而下以哭吾私。曾日月之不居。屬大葬之有期。薄陳一奠。維以洩哀。嗚呼哀哉。尙饗。

祭蔣季高文

維至正十七年歲次丁酉十月辛巳朔。越七日丁丑。友生烏傷王禕。謹以清酌庶羞之奠。致祭于亡友季高蔣君之靈。嗚呼季高。其竟死也。未可以死。遽爾云亡。不仁者天。忍至此極。初聞子死。人實不信。謂吾季高。無有死理。今乃死矣。孰不子哀。嗚呼季高。行粹以夷。事親從兄。孝弟兼至。處族交友。又誠以信。譬如美玉。絕無玷瑕。嗚呼季高。學精而敏。獵史蒐經。旁涉百氏。發爲文章。筆力甚雄。譬如神駒。有逸無蹶。人謂季高。必就遠大。拔出峻林。顯融當世。至于壽考。乃理之常。而其得年。甫廿有九。曾是一疾。遂以不起。嗚呼季高。當壽而夭。謂天可必。斯理曷究。天豈不仁。亦獨何忍。旣降之材。不降以年。有年有材。固罕兼得。較之二者。材不如年。藉令有材。促不得展。孰與有年。以享貴富。有年無材。常情所甘。材豐年嗇。人用嗟怨。抑人之生。稟氣於天。是氣之賦。厥有厚薄。所稟者厚。得年故壽。雖曰有壽。而孰無死。子之夭死。由稟氣薄。氣之薄者。子適稟之。天亦何心。獨薄于子。我觀衆人。碌碌庸庸。鳥獸同羣。草木俱腐。名與身滅。無足道者。雖壽而死。與無生同。凡若此者。天實薄之。其孰如子。克自樹立。受材之豐。學行俱懿。名譽昭晰。沒世有聞。雖則云

天其猶不死。天之于子。可謂已厚。子達理者。宜勿怨天。孰得孰失。孰重孰輕。造物其間。豈果無意。嗚呼季高。又何怨爲。子雖無怨。人則哀子。夫人所哀。况吾朋友。交誼之篤。無媿金石。死生契闊。日遠日疎。不有話言。何以慰子。子善自信。豈待我言。子母子兄。其哀尤切。匪言之複。無以慰之。酒肴在前。我言孔多。嗚呼季高。聞乎不聞。尙饗。

祭靈星祝文

夫田所次。實維農祥。百穀旣成。絜神之祐。爰稽彝制。式修明祀。神其來格。歲歲有年。

祭高麗國山川祝文

高麗爲國。奠于海東。山勢磅礴。水德汪洋。實皆靈氣所鍾。故能使境土乂安。國君世享富貴。尊慕中國。以保生民。明神之功。於是爲大。朕起布衣。今混一天下。以承正統。比者本國。奉表稱臣。納貢。朕嘉其誠。已封王爵。考之古典。天子於山川之祀。無所不通。是用遣使。敬將牲幣。往修祀事。以答神休。惟神其鑒之。

元故中山府判官致仕王府君墓志銘

府君諱鉉翁。字中實。王姓。處之遂昌人。五世祖景夔。宋慶歷間。仕知錢唐縣。遷淳王宮教授。自高曾至祖采。父蘭。並晦德不用。用府君貴。贈其父忠。翊校尉。溫州路同知。瑞安州事。母鄭氏。封宜人。府君器資不凡。自幼負志節。瑞安常奇之。曰。大吾門者。其此子乎。旣長。涉獵經史。通大義。視身律已。必由于禮。處物制事。

必本于忠信。人亦莫不以遠大期之。年弱冠。至京師。受知於司徒陳公。會福院立。爲其院宣使。出將使指。遠而吐蕃。雲南。靡所不屈。備殫其勞。考滿。授進義校尉。平江路吳縣主簿。郡守杜公名卿也。素知其材。大小政務。悉以諉之。豪民顧鍾朱郭四大家。怙勢爲不法。則發其罪惡。咸實于理。政聲卓然。居歲餘。以憂去官。調兩淮都轉運鹽使司東臺場鹽司丞。國課所資。淮鹽居廣。催督趨辦。如期而集。見稱廉能。除忠翊校尉。台州路黃巖州判官。所掌捕盜司。猾吏凶胥。結黨肆惡。久爲民害。至則以法痛治之。亭戶洪甲。恃不統于有司。恣爲暴橫。以私忿殺平民。吏白不宜問。府君曰。殺人之人。乃可置不問耶。逮捕繫獄。坐罪不少貸。奸民有挾僞鈔板詣官自首者。覲事發。因得誣連富人。肆其詐。察其情詰之。果自服。立命焚其板。不爲問。州北有浮橋。久且壞。捕盜司屋亦敝甚。皆撤其舊。使之一新。居三年。政績具舉。遷忠顯校尉。兩淮都轉運鹽使司餘東場鹽司令。於是倦於宦游。不俟引年。得請納祿。以昭信校尉。眞定路中山府判官致仕。尋屬疾。遂不起。至正丙戌八月八日也。享年六十有三。壬辰十二月七日。葬于家北君子山之原。元配鄭氏。封宜人。繼室潘氏。張氏。孫氏。初府君未有子。以弟鑑翁子浚爲子。晚始得子曰浩。用廕調衢州路龍游縣水北巡檢。早卒。無子。浚乃以其子棟及從子機爲之後。府君性英邁。儀槩峻整。其材敏而裕。練而不矯。治家內外有法。居官蒞政。不務爲苟同事。無鉅細難易。無不勇爲。爲無不當者。故其所至。輒有聲。維王氏之先。奕世載德。厥後宜大。及府君出位。雖不克稱其材。亦庶幾光顯矣。浚來徵銘。故爲銘。銘曰。

王望遂昌。厥稱德門。承乏維材。用亢其宗。維材之良。有蘊必伸。乃卽官序。厥聲以聞。進也。懷惻。胡不大振。亦旣光華。昭受寵恩。君子之山。宅兆攸存。春雨在樹。秋霜在原。歲時來思。衍爾後昆。悼幽著銘。爰勒貞珉。

劉先生墓志銘

處有文學之君子曰劉先生。演字浩卿。生於大德庚子九月十日。卒于至正壬辰三月九日。享年五十有四。嗣子師曾。以己亥十月十三日。奉柩葬于麗水縣孝行鄉之桐原。旣乃以書抵禱曰。先人所與游者衆矣。然相知之者。宜莫子若。葬必有銘。茲誼爲古。銘先人者。非子而誰。以惟子也。請。昔先生之典教義烏也。禪時在諸生列。託斯文雅故。非一日。重以師曾有請。銘安敢辭。劉氏世爲處之麗水人。祖桂。父澤。皆不仕。先生生有美質。于書無不讀。自少攻爲文章。有聲籍甚。上饒鄭君原善。其學長于經。而明于性理。天歷間。以名進士爲處州錄事。先生因從受業焉。磨礱浸灌。所資日深。其於經書。春秋尤精。著其大義。輯爲成書。一時學者。皆誦習之。其爲說。務以發前儒所未及。非特利後生小子。場屋之業而已。其他所爲文。皆從容順適。不戾于樂職。講辨論議。咸足以達其意。要其歸無不本于理者。至于詩歌。則春容大篇。如奔濤怒風。勢不可遏。鏗鏘短句。如鳴金戛玉。粹然成音。流麗而平實。自成一家言。嗚呼。先生之所自致若此。所謂文學之君子。非歟。先生姿貌豐整。儀度醞藉。性倜儻。且和易。樂周人之急。與人交。無間親疏。久益相好。四方士大夫至是邦。無不款門者。先生與之游。或談經術。或論政理。或以詩章相倡和。莫不厭其情。乃去。餘膏

賸馥霑被于人爲多。至正初起爲義烏儒學教諭。又爲教諭龍泉。後署明善書院山長。未及上而遂卒。蓋先生之志甚遠。其材甚周也。惜乎不克顯融。不及展其材之蘊。而推其志之所欲爲。故其卒也。無不爲之嗟悼。嗚呼。抑豈知先生之自致於不朽者。固不在彼而在此也。先生娶同郡葉氏。有婦道。前十一年卒。至是合葬焉。子男三人。長則師曾。次師夏。皆能世其家業者也。次師雍。蚤夭。孫男一人。煜。女二人。銘曰。嗚呼先生。邦之良也。學韞于躬。氣又昌也。振華舒耀。爲文章也。儒林文苑。肆翺翔也。雖遏厥施。所存者長也。亦旣全歸。茲其藏也。後千百年。勿壞傷也。

故薛君墓銘

維薛氏遠有系序。其先望于河東。而盛於永嘉。宋紹聖中有諱堯章者。來守處。因留居處之松陽。子孫遂爲其縣人。堯章生虞佐。虞佐生景夔。迪功郎。景夔生士榮。宣義郎。士榮生南。通春秋學。爲某軍節度掌書記。南生殊行。沿江制置司幹辦官。殊行生三子。君其長也。君諱必慶。字天福。資性純篤。自幼沈粹不凡。言不妄發。動必由于禮。旣長。益力學。不務華靡事。自聖人之經。下逮諸史。百氏之說。靡不涉獵。而通其義。然雅不喜事章句。常曰。讀書將以求聖賢之道。達則推之見諸用。處則蘊之有諸己。文章殆餘事也。平居接物遇事。悉本於誠懇。恥趨媚權貴。與人交。煦煦有恩意。聞人有善。稱道之不置。不啻若己出。己有善。未嘗以自矜也。以故賢士大夫。皆樂從之游。相與徜徉泉石間。世故邈不以經意。時年方富盛。退然如老成人。

徽聲休閒播揚于時。辟聘累至。而高蹈之志益堅。因自號曰雅山處士云。初幹辦君之配張氏。無子。而宋氏實生君。葉氏生必茂。必振。君事異母如其母。撫二弟如同母弟。祖母徐氏。高年多病。曲意養之。得其懽心。其孝友甚著。君雖韜晦不自見。而不以獨善其身爲已足。每思推以及物。人蒙其惠利甚多。而不幸年不及艾以卒。故其卒也。聞者莫不嗟悼之。君生于宋開禧己未十一月日。卒于元元貞丙申六月日。得年三十有八。先娶項氏。再娶劉氏。子男一人。溶。劉出也。孫男二人。益。莊。曾孫男五人。圭。堅。增。埏。坤。君卒後十六年。至大辛亥八月日。溶始奉柩葬于縣北城後之原。葬且五十年。益乃奉鄱陽丞李貫道所爲狀來乞銘。惟昔眉山蘇公軾。嘗以大父之銘屬諸其友南豐曾公鞏。其言曰。大父行甚高。而不爲世用。故不能自見於天下。然古之人。亦不必皆能自見。而卒有傳於後者。以世有發明之者耳。嗚呼。行高而不爲世用者。獨蘇氏歟。益方以文學名。將無媿蘇氏之有孫。而所以發明之者。禕非其人也。然益與禕辱爲友。銘其敢以卒辭。銘曰。

薛家松陽。由溫來遷。世業載續。弗蕃而綿。六葉逮君。益祗厥紹。德蘊于躬。不詘不矯。不震以懼。銷聲闕煇。委社于後。孫曾是貽。彬彬孫曾。旣茂以碩。維善有徵。視此貞刻。

劉母徐夫人墓碣銘

鄱陽劉君燦。告于金華王禕曰。以吾子之厚於我也。竊願有請焉。昔我先君子。隱居以求其志。凡可以聳

善扶誼者。無弗爲也。用是見稱一鄉之善士。抑所以警戒而相成者。實吾先夫人內助是賴。初我外家徐氏。宋建炎間。有來守鄱陽者。因家焉。三世爲外大父瑞。用中漕司試爲昌江書院主學。兩娶皆黎氏。先夫人諱妙靜。生六歲而失所恃。天性慧敏。外大父鍾愛之。教以列女傳等書。靡不通曉。淑聞用彰。先君諱籌。字竹友。有學有文。始娶王氏而卒。繼乃請婚徐氏。外大父以我劉氏詩禮鉅族。而先君又賢也。以先夫人歸焉。既來歸。逮事我先大父。備盡婦道。先君好施予。族屬里黨之困匱者。必賑給之。而又賓客款門無虛日。先夫人佐之。理粟帛。具酒食。內外設施。舉中其度。未嘗有德色。處妯娌必以禮。御戚獲必以慈。貞譽懿聲。藹如也。不幸先君子蚤捐館。先夫人于是獨持家政。益斬然有條。延聘名師以教諸子。皆使有成立。晚歲究心內典。然猶躬織紉不廢。且復以教其子者。教其孫。蓋年六十而遂卒。其卒當至正丁亥五月某日。先期以語其子。乃衣冠端坐而逝。子四人。榮、燦、光、燭。伯季皆卒。獨燦在焉。女三人。壻曰陳善、陳備、章潮。孫四人。泮、翼亦已卒。次曰鷺、圭。嗚呼。此吾先夫人世出行實然也。痛矣。吾邦頃歲。薦罹兵革。以故先夫人之喪。久猶權厝。乃今得卜。始克以某年某月日。奉匱葬于某鄉某山之原。葬必有銘。故用爲子請。幸無以讓爲禱。爲之言曰。嗚呼。人子之所謂孝者。以能揚名而顯其親也。君今以文學名。卓卓自表見。是可謂能孝矣。而曷以銘爲。雖然。夫人事夫則能成其志。教子則能成其才。德之所致者厚矣。是固不宜無述也。庸次第君言爲序如右。而系之以銘。銘曰。

夫也善士子則名人曷其致之化由閨門黃裳元吉媿德爲坤著茲石章以永於聞。

謝節婦墓表

節婦謝氏諱黻金華人也。謝氏儒家有女不肯與凡子擇所宜歸得同邑吳履字德基以爲壻。節婦性剛而質柔巽平居不妄嬉笑勤儉以持家而事舅姑奉賓祭舉無違禮履爲儒學官宦游于外其得無後顧之憂者節婦內助之功居多歲己亥大軍下建德勢且東節婦語其夫曰亂將及矣盍爲走避計先事弗圖後悔何追察其夫意猶豫不決則恚曰盍不歸我母家我母家有深池萬一事不測當有入水死耳義不身受辱也未幾蘭溪破亂兵四出擄掠而履適他往節婦攜男女走入金華山中途失其幼男號哭求之弗獲而兵且至自度不可免行至向塢巖險處以幼女投巖下身繼之而死十月七日也死十餘日履以物色求之得其屍叢棘中面猶如生遂附葬向嶺先墓之次於是得年三十有九矣生男五人今存者二曰穎稚女二人今存者一曰媛適張惠旣葬履屬其友王禕爲之銘王禕曰嗚呼頃歲以來天下大亂葬倫之數甚矣自學士大夫猶不敢望其盡節而況於女婦乎當是時謝氏乃能秉節以死賢於人遠矣銘其曷有媿辭銘曰

人孰不有死死其難乎烈烈節婦處死爲安乎豈躬之弗恤將歸全乎貞名懿標圭璧其完乎倫紀用以立不永傳乎勒銘昭之盍茲鑒觀乎

錢夫人羅氏墓銘

夫人諱靖。羅氏。池州青陽人也。羅故青陽大家。居九華山西之宏谿。父某。母程氏。皆鍾愛夫人。擇所宜歸。年二十。以歸于同邑錢氏。爲處士諱龍祥之配。錢氏在其邑。尤稱望族。夫人相其夫。承祭祀。禮賓客。植門戶。卹閭黨。備盡婦道。逮事舅姑。以孝聞。不幸處士君早卽世。夫人乃專秉家政。能使資產益豐。而家日愈盛。然性慈愛。好施予。恆語諸子曰。家幸充裕。苟羨財餘粟。不推以及人。其若造物何。凡宗族姻戚。與鄉黨人。匱乏不給。或貧無以自存者。有來告。必量輕重賑貸之。雖賑之厚。無吝意。雖貸之數。未嘗有德色。又常戒諸子。以謂人之爲人。在乎親師取友。相觀而善。乃有成耳。以故賢大夫士踵其門。必命諸子曲盡禮意。而從之游。蓋自處士君歿。夫人孀居者餘二十年。貞聲徽譽。藹焉著聞。鄉邦之人。莫不稱錢氏有賢母也。夫人生于至元辛卯十月日。卒于至正丁酉九月日。享年六十有七。卜以歲乙巳某月日。改葬于貴池太平鄉錢仲山之原。男四人。濟。澤。清。濬。女一人。適羅執中。孫男五人。女六人。初夫人篤于教子。濟從學禮部尙書宣城汪公。遂以文學稱。而清尤精於藝術。且倜儻尙義。遭時多故。率民旅以衛鄉井。用功累遷武略將軍。淮西道宣慰使司副使。僉都元帥府事。方嚮用於時。於是濟。澤皆已卒。清旣畢襄事。而紼纒之碑。無文以刻。及使來請銘。銘曰。

婦主內事。無非無儀。其以善稱。乃變之宜。猗嗟夫人。相夫以隨。中遭家難。秉節弗渝。益豐其蓄。益厚其施。

教誨厥子。式充嗣之。有婉淑德。揭貞揚徽。維是壺範。女婦攸師。錢沖之原。氣深壤夷。元堂旣固。尙安于茲。故松江府判官致仕王公墓誌銘

公諱肖翁。字傳朋。姓王氏。世爲婺之金華人。宋太師左丞相魯國文定公諱淮之元孫。中大夫太府卿贈少師東陽郡開國公諱棟之曾孫。中奉大夫直敷文閣福建路轉運計度副使金華縣開國男諱俗之孫。朝奉郎將作監主簿諱琦之子也。公自幼卽知問學。旣長。才業兼茂。爲宗鄣所欽仰。又其姿表明秀。風猷醞藉。雖運去物改之餘。望而知其爲相門子弟矣。起家衢。婺二郡儒學錄。大德中。陞婺郡儒學正。考滿。當得教授一郡。而國制。教授必年艾以上。始得爲之。公名上天官。未四十也。是時奎章閣侍書學士蜀郡虞公集與公生同歲。亦以儒學正考滿同在選中。而年皆不及格。有司以常制持之。廷臣言虞集。雍忠肅公孫。王肖翁。魯文定公孫。皆前代名宰相家子。且學藝不羣。不得拘于常制。于是虞公得教授京畿。而公爲靜江教授。南方歛暑多瘴。公到官。居亡何。卽移病而歸。家食十年。延祐末。復起教授南康。會白鹿洞書院山長缺。郡守請公攝山長事。書院久廢。公爲復興之。新其屋宇。廣其田租。而來學者滋衆。士譽翕然。至治初。辟江西行中書省掾史。贛人有因覈田虛增糧額萬餘石而生變者。事數年不決。公以謂民變雖靖。而糧之虛額。宜在所必除。儒學官待選者以千數。先是持選衡者。皆顧憚不敢理。日致壅滯。公閱選簿。爲之銓注。數日而畢。由是宰臣器重之。惟其言是用。休閒以彰。泰定四年。積年勞。除將仕郎海道都漕運萬戶。

府知事海道歲漕東南百萬之粟供億京師以事興法從事其任至重自漕帥主僚吏率以選居公居幕中三年上下克協漕事訖辦僉以爲能仍紀至元二年轉從仕郎嘉興錄事適歲祲部使者檄公行視田公爲具實以聞得免荒租數萬石他州郡有奸利事部使者悉以諉公決公決之無或不當者惠利及人甚衆政績益著未幾屬疾請致其事遂以承務郎松江府判官致仕命未下而公卒其年十月癸巳也享年六十有五以五年二月壬寅葬于金華縣婺女鄉施家塘之原公娶唐氏子男六人萱某官藻杭州路海寧州判官蘭鎮江路錄事判官荃葵葯高節書院山長女三人適劉文同申蔓吳某孫男十八女八人公天性孝友事親無違禮養寡姊弱甥無失所者教諸子必由於禮法家庭之內肅然有儀所得祿秩多以周親黨賑貧乏內顧不足不以爲累高懷雅興一寓于詩而尤善筆札論者謂其酷似吳傅朋短章醉墨人爭寶愛之初魯公在淳熙間久居相位是時南北講解中外無事一用柔道佐時繼尙利喜功之說以休養其民人以故南渡以還論相業者咸稱王氏魯公之從子是爲文憲公實學于何文定公基以傳考亭朱子之道而敷文又受樂于文憲以及擢堂劉先生炎雙峰饒先生魯其學皆本于朱子於是言道統者復推王氏爲濂洛之適傳矣維公之生憑藉世德相業之隆道統之重萃于一門者累世承傳逮于其身不可謂無所託也惜乎不大顯融不足以究其志之所就然論天道者謂王氏宜有後而公侯之子孫必復其始後之來者尙有徵焉銘曰

大山穹林。良材所生。世家名閥。是生峻英。娶衣冠家。孰盛王氏。相業道統。聯徽襲軌。奕業載德。委祉于公。公繼承之。文憲在躬。際今昭代。仍有祿仕。明世其家。克濟厥美。君子之澤。維衍益延。盍觀水木。期有本源。斷石刻辭。爰志陵谷。尙其嗣人。是似是續。

王忠文公集卷二十

贈禮部員外郎葉府君墓銘

至正八年正月。國子助教葉君恆。以官六品。援著令。推恩於父母。贈其先府君承務郎禮部員外郎。先夫人追封恭人。於是夫人前府君七年卒。而府君之卒。今二十年矣。恆謂予曰。我先府君之壙。侍講學士虞公爲之志。而吳文正公實書我先夫人之表。日月行矣。以恆之無似。克有祿位于時者。其來有自。而褒崇所及。國家廣孝治。以勸勵臣子之意。非藐焉小子所能當。固不敢如昔人之有待。而所以致此者。不宜無所撰述。以修上恩。而昭先德。子尙爲我爲之銘。以刻諸墓上之碑。予不敢辭。則取二公所不書者。列書之。府君諱遜。字謙甫。姓葉氏。祖父以上。皆潛晦不仕。世居越之餘姚。今著籍爲明之鄞人。初府君無他兄弟。而伯父死亡嗣。方病革時。召府君語之曰。爾其爲我後。府君未知所對。而目已瞑。乃爲服三年喪。後生二子。遂以次子恂奉其祀。而恩禮得兩全矣。父年耄。病且殆。府君焚香酌水。露禱于天。願減己年。以增父壽。恍見空中有神人。示以三指者。病隨愈。後三年乃歿。府君服喪過哀。旣免喪。猶不御酒肉。人稱其純孝焉。府君待人。無閒尊卑疏戚。一以誠實。尤樂周人之急。大德間。歲饑。朝廷命富民出粟以賑貧乏。有司擇鄉里爲人所素服者。俾第其多寡。府君首被其選。大家小戶。咸服其公平。旣而疫大作。府君致醫者爲人切

脈而合藥施之。門閭中賴以全活者甚衆。其行修于身而惠澤及物多此類。府君卒以泰定五年正月日。享年六十有七。明年正月日。與夫人合葬縣西儀鳳鄉青山之原。夫人褚氏。相府君治家有法。孝于舅姑。仁于姻族。母儀婦道。見稱于鄉。其卒以至治元年十二月日。而葬則明年正月日也。子男二人。長則恆。由國子生。釋褐授從仕郎。紹興路餘姚州判官。除翰林國史院編修官。今轉承務郎。遷國子助教。次恂也。爲伯祖後女二人。適陳某。王某。孫男五人。女二人。昔歐陽文忠公之言曰。惟爲善者能有後。又曰。爲善無不報。而遲速有時。此理之常也。嗚呼。以予觀于府君。庶幾所謂善人矣。雖弗克自見于世。昭被融顯。然卒以子貴。享身後之榮。於是有以知天之所以報施善人者。非可誣也。銘曰。

君子爲善。旣積于躬。受報或裔。後其必豐。猗歟府君。厥積維厚。承之有賢。徐觀身後。皇用褒贈。有隕自天。龍光所被。賁于漏泉。善無不報。斯乃常理。刻茲石章。垂徽千祀。

故孫君墓碣銘

君諱辰龍。字君旂。姓孫氏。其先由婺之金華。徙睦之桐廬。遂爲其縣人。高祖顯。曾祖寶。祖謙。宋漕貢進士。父之才。承奉郎致仕。母方氏。贈孺人。三子。長潼發。咸淳戊辰進士第一。由衢州軍事判官。辟御前軍器所幹辦公事。宋亡不仕。學者稱爲盤峰先生。次堯龍。咸淳庚午鄉貢進士。次卽君也。君資識穎敏。篤志問學。一門父兄。自爲師友。業成末由以自見。而運去物改矣。至元丙子。國兵南伐。縣燬于兵。君攜家避地萬山。

中草棲露宿。備嘗險艱。久之。乃與其兄歸。復故宇以養親。蜀名卿史公繩祖。爲取承奉公誥語。扁其堂曰志樂。君事親以養志爲先。不特服勞飲食而已。親有疾。憂形于色。食不下咽。故相鑑公夢炎告老南還。來訪君。尋舊好。嘉其志行。嗟嘆而去。居喪過哀。毀瘠成疾。二兄旣先卒。君獨營喪事。無違禮。宰木拱矣。而孝思無忘。歲時祭掃。猶涕泣不已。教子以義方。律已悉用禮法。雖子姓來省。不冠不見也。然性剛介。人有不直。輒面直之。有以篋貯物寓君者。歲久且死。則物色而歸其家。人咸服其質實。至大間。部使者行部至縣。處以學職。滿考當得教官。辭不就。延祐初。科舉法行人。未之習。君教其鄉人子弟爲之。皆知所取。則縣乘嘗修于先生而未就。君繼志續成之。後人故實得有所徵焉。晚歲屏絕家務。惟冥居默處。間挾書史以自娛。暇則與朋舊相羊山水間。不復知有世事。因自號曰求心云。元統乙亥。君年八十。而十月九日。乃其初度。親黨咸會。宴勞累日不倦。尋感疾不起。二十五日也。以其年月日葬縣北大隱阡先塋之次。娶王氏。後三年卒。合葬焉。子男二人。師道。師德。孫男五人。曾孫男三人。昔者先生娶將作大監朱公杰之女。久居義烏。與禕先大父石峽府君相友善。禕生也。後不及識先生。而君之孫紳。辱與禕交。因以君銘爲屬。惟春秋之所謂吉德。大易之所謂幽人。君實似之。歿世之後。其潛光逸迹。誠不宜使之泯泯無聞。乃爲序述其業行。誼而繫之以銘焉。銘曰。

孝於親所以成其身。求諸心所以復其真。旣全旣純。弗舒弗振。弗替有延。其在後之人。

趙君墓銘

趙君觀光字觀國慶元之鄞人其先仕宋曾大父逢龍宗正卿兼侍講大父建知徽州婺源縣父似翁始晦德不仕君幼多智識稍長好讀書通達時務以郡博士弟子員得推擇試吏奉化州尋遷昌國至十年冬黃巖海寇薦起而昌國爲州在大海中距黃巖一息可至也其州侯帖木兒不花問計於君謂今州兵寡弱且不諳水戰惟蘭秀二山居民悍勇善鬪擊習海事若募以厚賞示以重賞其人必樂爲我用用以擒賊無難矣侯然君言卽以其事委君君招諭有方不擾而事集明年正月從侯引兵出海關帥府總軍民兵同會海門洋俄而賊船百餘艘卒至衆皆惴縮莫敢進獨君所部民兵與奮戰至晚無大勝負明日君方分給軍饋巡隄上賊船又大至卽說侯速進敵而賊衆數倍我軍莫支君持短兵接戰矢石交下軍與賊不可辨且後無援兵遂執節以死侯亦遇害是月二十五日也方君募民兵時或見其不憚勞動私謂君曰侯受天子命守茲土盡忠報國固宜君不過一小吏設有功且不顯儻有不測寧不重貽父母憂君曰人臣食祿死其難所也吾雖小吏亦旣食其祿矣臨難以避可乎於是卒戮力捐軀以及於難得年三十有五以某年月日葬某山之原娶戴氏子男二人君爲吏廉而有守勇于趨事赴功上官悉信用之然皆夫人之所能至其死事昭顯如此則有人所難能者矣嗚呼忠義天性也由之而致死故死皆無媿而世徒論其人之貴賤以爲其死之重輕何哉銘以表君之藏他日史氏傳忠義者尙或有徵也銘

曰。死有不朽。殺身成仁。名則既完。遑卹厥身。我作君銘。刻在貞珉。

袁母奚夫人墓誌銘

吳郡袁君泰喪其母夫人。將葬。哭泣以告。諱曰。泰不夭。生十有四年。而先君棄諸孤。維是諸孤藐焉無依。袁氏不絕如綫。賴吾母左右維持。以長以教。故我兄弟克有成立。獲祇厥紹。袁氏之不墜。繫吾母之功也。吾母之幼也。卽以令淑聞。爲親所鍾愛。擇壻縉紳家。我先君早以文行知名。遂以歸焉。時年甫十八。躬織紉。親酒漿。以致養舅姑。承事賓祭。夙夜敬共。罔有違德。自先君之歿。嫠居四十年。艱難憂患。蓋所備嘗。我兄弟以不能盡孝爲慊。不幸今不及養矣。泰也綿綴殘息。厥旣得卜。奉柩合葬于長洲東吳鄉緒墩先塋之兆。而未有銘也。敢爲子也請。諱惟君之先君靜春先生之銘。內翰黃公實爲之。顧諱末學。乃敢銘夫人乎。雖然。諱之交君有素。誼不得固辭。則爲序而銘之。序曰。夫人諱志寧。奚姓也。奚爲吳著姓。吳江之同里。其世所居也。宋將仕郎諱仲常者。其父也。夫諱易。字□父。卽靜春先生也。子男四人。震先卒。次卽泰。次晉。次聰也。女五人。長亦先卒。餘則顧天麟。歸德英。顧正。許德明。其壻也。孫男十人。女六人也。享年八十有四。卒以至正六年十二月六日。其明年正月六日。則葬之年月日也。銘曰。爲婦而婦。爲母而母。嗚呼。是維夫人之德。以銘其墓。

陸夫人墓志銘

友人吳郡袁君信。以書來告曰。信私門積蠶。往歲七月。不幸喪吾母。亦既忍不卽死。奉襄大事。不一月而吾妻又卒。吾哀苦良劇。情有弗堪。窀穸之事。不能遽圖也。因循踰年。始克卜地以葬。元堂之銘。以唯子也。請。禱不敢辭。夫人諱順。姓陸氏。陸爲吳郡長洲之大姓。父諱元吉。母趙氏。夫人資稟溫淑。而性聰慧。年十有七而孤。其兄慎擇所宜。久歸之。乃以歸于袁氏。袁亦長洲著姓。信字可立。素以文行稱于鄉。故夫人歸之爲繼室。而年已三十有五。撫育其前室之子曰穰。曰种。女曰孟賢。曰季甯者。不啻如己出。其子若女。亦安其慈愛。不復知己之異出也。相其夫。理家事。內外井井有條。事姑盡孝。甘旨之奉。必親爲之。及旣嬰疾。而姑病亦革。常左右就養。不少懈。姑歎曰。汝事我善。今願因我以重汝疾乎。因泣謝曰。婦人之職。主中饋。養舅姑而已。婦不及事先舅。幸逮事大人。誠能盡子婦之道。死且不恨。旣而姑卒不起。力疾理喪事。哀毀殊過。比葬返哭。而疾益甚。遂不可爲矣。夫人之卒。實至正十四年八月十九日。享年三十有七。親戚里黨。莫不爲之悲傷。以爲袁氏失賢婦也。夫人平居寡言笑。行履端謹。雖婢妾未嘗加以疾言遽色。閨門之內。雖離然咸樂其宜焉。嗚呼。是可謂得婦道矣。然而不及中壽以死。其不可哀矣夫。夫人葬以十五年某月日。墓在某鄉某原。銘曰。

黃裳元吉婦之德。德而不壽。天莫必。嗚呼。夫人安此室。

故石門書院山長吳君墓誌銘

君諱益懋字仲謙吳姓處州龍泉縣人也。父妙莊贈忠顯校尉松江府判官母章氏封宜人。君性閎敏自幼力學攻辭章。方是時爲士者未有科舉之累君所爲學務有議己不資爲進取計也。大德丁未歲大祲忠顯府君傾餘粟以賑餓者君左右其志鄉閭之民多賴以存活里民蔣申爲貧故以其妻詭爲所買婢鬻之君既而知其爲妻也遽遣還之不復責其直吳乙以田來售已庚其價矣而其弟私以半田畀浮屠氏訟于官悉以歸君君尋知爲其家祭田則曰吾安用有此而廢人之祀乎即以還吳氏有張丙者貸君陶器貨于長沙其價不訾而舟車艱難耗折大半君閱其情凡子本合徵者盡丐之陶戶假貨于君有久而不能償者則聚其券焚之一置不問浙右大饑民流移徙他郡而大府下令拘流民反元貫在君邑者君爲具舟楫備糗糧遺送之咸得無恙而他邑所遺物故者多矣人有產子不舉而綴約置路傍者君見之惻然募人育之而重與之貲其爲人仁厚而倜儻緩財急義若此類甚衆鄉邦用是多之君嘗以舉者辟松江府文學不應復用宰臣薦署石門書院山長石門在青田去君家爲近且山水最奇勝則忻然赴之居久之乃歸既歸遂不復以家事經意每良辰佳節從賓友尋林泉幽絕處寄興詩酒意有所適輒悠然忘返友愛其弟產業一以付之及分析惟其弟所取不與計薄厚母舅不能自存養之終身如事其母其孝之至又如此君年三十有七以延祐元年正月九日卒元配陳氏宋朝奉大夫沂之孫女生二子曰

天澤曰天濟女一人適季良繼室何氏宋丞相正獻王執中之裔孫女生一子曰清孫男四人檉楫模柱女五人曾孫男二人熊熊女二人君卒後八年當至治二年九月某日葬龍泉鄉金沙里槎牌之原以陳氏祔葬且四十年而楫由武功授龍泉尉乃奉其父天澤之命以里人葉子奇所爲狀來請銘嗚呼孝子慈孫之欲顯揚其父祖固何間于久近况君勇於爲義行應銘法宜書以範後人余曷敢曰不可因爲序而銘之銘曰

年不中壽仕不厚祿胡性之祥而命之不穀維餘慶所施益綿以篤尙後之人是似是續

故傅母樓夫人墓碣銘

里友傳權與其弟藻衰經踵門以告禱曰吾母之喪窀穸之事亦既畢矣維是貞節懿範所以作則閭門者不宜無所紀載墓上之石子幸爲之辭雖然吾母之詳吾悉數焉子尙有擇也吾母樓氏樓氏吾烏傷士族也吾母在父母家早有淑聞而我大母亦樓氏先君樓氏之所出外大父稔其行之良也故吾母歸焉於是吾母視其姑爲姑事之盡婦道其歿也治喪無違禮先君兄弟四人篤于友愛每時節會飲率至夜分吾母治具承其懽無懈意先君有腹心之疾吾母手調藥餌衣不解帶者累旬人不見其有不堪之色也故廬爨于菑則銖積粒聚佐先君重構之未畢工而先君歿矣先君之歿也我兄弟俱在幼吾母力持家政既克襄大事卽斷髮爲誓以節義自許用撫育我兄弟且俾從名師游以權兄弟之無似而能知

所植立者。吾母之教也。吾母秉心既貞固。不復以貧窶爲卹。服勤紡績。以夜繼日。雖風雪淩厲。亦雞鳴迺已。先君有宿逋。臨歿時。屬從子以別產爲償。既乃負所屬。吾母捐紡績之資。庚之弗與較也。吾母性慈祥。而和易。待妯娌和姊妹。撫羣從子姪如其子。咸盡恩意。而得其歡心。內外宗婣。稱其賢。無閒言者。於是年既七十。然耳聰目明。康強固無恙。蓋罄居者三十年矣。武威余忠愍公。持部使者節行縣。嘗題吾母所居堂曰貞則。金華宋太史實爲之記。縣大夫又以耆老之請。謂吾母貞節。在例宜旌表。上其事。未報。而吾母已矣。嗚呼。權等尙忍言之哉。禱聞其言。作而曰。吾與子兄弟。居同里。學同師。夫人之賢。吾知之有素矣。子之言。安敢以不志。乃備著之于右。夫人諱瑩。字貞秀。姓樓氏。世爲烏傷人。卒于丁未歲十二月十七日。享年七十有五。葬以卒之明年正月朔日。墓在縣西崇德鄉宅山之原。子男二人。卽權、藻也。權有馴行。晚好浮屠氏學。藻受業黃文獻公之門。以文學名。女二人。壻曰王大節、朱元禮。孫男三人。女四人。銘曰。吁嗟夫人。秉貞則兮。再造厥家。全婦德兮。亦既壽考。又多福兮。有嘉靈儀。垂楷式兮。焯幽振潛。勒茲刻兮。

太原郡夫人葉氏墓誌銘

洪武三年正月庚子。中書右丞王公溥言于天子曰。臣之父晉母葉氏。實生臣溥。及臣弟漢寶。而臣不天。父也棄諸孤早。所恃者母氏。以長以教。故臣兄弟克有成立。而母氏之亡。亦已十八年。顧臣無似。獲事陛下。比者推恩褒崇二代。假寵於王氏甚厚。獨念臣去鄉邑日久。儻賜之告。得歸展省邱墓。以伸私情。臣不

勝至願。於是皇上閱焉。有旨予告。所以撫諭之者良至。仍勅儀曹具祭物給之。公將行。以母夫人墓宜有識。請銘于史臣王禕。禕不敢辭。謹按追封太原郡夫人諱某姓葉氏。饒之安仁縣人。歸同里石港王氏。爲贈資善大夫中書右丞上護軍追封太原郡公諱晉之配。資善大夫中書右丞溥。昭勇大將軍崇仁衛指揮使漢寶之母。夫人性慈惠。治家以勤儉。族嫗里黨莫不稱其賢。至正壬辰。干戈倣擾。饒信首被兵。明年三月。右丞公奉夫人避兵於信之貴溪。倉卒之際。母子遽相失。繼而公起兵衛鄉里。會皇上徇地江右。遂舉其地來附。拜中書右丞。分鎮建昌。蓋自癸巳至丁未。凡十五年。夫人所在不可知。而公思慕之情。日夜未嘗置。是歲正月。忽夢夫人若告以其所在者。命卜者筮之。其繇辭曰。非巖卽穴。厥得朽骨。五月。躬率士卒詣貴溪之桃源山。卽向夫人避兵處也。伐林木入山。以物色求之。不可得。哀號者三日。旣乃得其地。居人吳海能言兵相逼時。夫人病不能行。卽自投井中死矣。公乃披榛棘。尋得井。俄有鼠自井中出。跳入懷中。旋復入于井。汲井索之。夫人之遺骸果在焉。公哀號益不自勝。以是月某日。具衣衾棺槨。卽其地禮葬之。夫人之卒。享年六十有七。二子。卽公及漢寶也。孫男若干人。女若干人。嗚呼。父母之喪。人子之不幸也。而右丞公則又遭乎其事之變。罔極之德。曷從而報之。抑人子之圖報其親者。固無閒于存歿。用是公以功業自奮。出入將相。勤勞王家。而馳恩錫命。賁及泉壤。所謂立身揚名以顯其親者。于是乎在。是雖遭事之變。而能合禮之正。仁人君子復奚憾焉。銘曰。

顯允王公。乘時奮庸。入建相業。出成將功。載念所恃。實育我躬。昔丁艱難。久銜哀衷。孝思之至。神明可通。乃安體魄。兆域以崇。以壤以樹。若堂斯封。天子有命。禮貴飭終。龍光赫奕。賁于幽宮。公曰噫哉。君命實隆。豈我陋微。能亢其宗。精思厥孫。積慶所鍾。春雨在草。秋霜在松。世世子孫。來瞻來同。

故申府君墓誌銘

府君諱佑。字君佐。姓申氏。金華人也。曾祖埜。祖饒。父鎮。皆世不顯。至府君始以儒術自奮。有聞于時。天歷初。用御史舉。署饒州路餘干州儒學教授。修學宮。養士類。翁有聲譽。調平江路錄事判官。平江大郡。民物殷盛。盛利剔蠹。事功以集。適歲大饑。慨然曰。大府願以勸分爲己任。諭巨室。移粟他郡。食餓人。全活者衆。奸人羅甲。收良家女百十人。抑使爲娼。因交結權貴。邀納貨賂。既廉得其奸狀。卽白發之。坐甲重罪。還娼女良家。奮不顧利害。政譽大著。遷饒州路德興縣主簿。縣西五里有溪。控驛道。其流湍悍。涉者病之。相其宜爲浮橋。以鐵絙比舟。上架板皮。用濟不通。仍買田予守橋者。俾以歲入爲繕修之資。民便之。名橋曰棲鸞渡。爲申公立生祠橋西。刻石頌之。郡學田八百畝。爲豪富民所占。歲久不可理。大府命理之。卽具究其實。得田之形狀。左驗悉與碑誌合。豪富民乃噤不敢爭。田盡歸于學。其政績大抵如平江。辟湖廣行中書省掾史。裨贊碩畫。宰臣咸器之。居無何。遽請休致。謝事而歸。以承務郎婺州路永康縣尹致仕。距故居五里。中和山之陽。結屋曰澹庵。日相羊其間。世慮漠不以經意。遂終老焉。歲庚子二月某日。以疾卒。享年七

十有五。卽以其年某月葬于中和山之麓。遵治命也。元配劉氏。繼室潘氏。子男二人。長曰瀾。用廩累調永康縣丞。次曰沚。女二人。適唐絃。徐某。孫男二人。將葬。瀾奉里人邵謙所爲狀。告其友王禕曰。先人墓石宜有銘。以唯子也。請禕不敢辭。銘曰。

申以國氏。支于金華。奕世載德。厥稱大家。是生才賢。以學自奮。位則不從。奕有休閑。晚贊相府。庶益有爲。胡斂其華。卒弗大施。惟仕與止。蹈其斯正。不激不迂。爰考終命。尙克有子。而又有孫。委祉所鍾。其衍綿綿。中和之墟。闕歸玄宅。匪銘不昭。用刻山石。

故翁君墓誌銘

娶之永康。有厚德君子曰翁君榮。字德潤。生于宋咸淳辛未五月日。卒于元至元戊寅四月日。享年六十有八。至正甲申正月某日。其孫瞿奉柩葬縣南義豐鄉金豚山之陽。久之。乃奉臨海張君顯所爲狀。謁予。銘瞿之言曰。先大父雖生不有祿位。無以自見于世。而德之所存。有以承其先垂諸後者。儻足以不朽。惟是懸綽之石。不宜無刻。儻假以一言。論次而褒美之。使託以永久。獨非仁人君子與人爲善之盛心乎。予惟張君嘗攝令茲邑。稔知君行。其言可徵。而瞿又辱與予游。序而銘之。固不得苟讓也。翁氏世爲永康名族。以行義稱其鄉。君曾大父安。大父文約。父樸。從父桂。皆世有貞德。潛晦不耀。君資稟純茂。好讀書。通大義。卓然思有所植立。以繼紹其先業。禮以檢身。儉以理家。與人交。忠厚和平之氣。藹然可挹也。所居去縣

治不數里而近。足迹未嘗至城市。出租稅以給公上。惟謹。吏胥莫或踣其門。里中有不平者。咸取直于君。君爲之直。必使各得其平。乃已。或有以匱乏告。輒推所有濟之。不少吝者。客有自睦來歸者。君左右調護之。使植其家。至于富饒。其解人之紛。周人之急。振善扶誼。如飢渴之于飲食。爲之無倦也。君天性孝友。母趙氏。實生涯。君于涯爲庶兄。凡家事一付之涯。略不較短長。以故得母氏之歡心。涯早卒。撫其子如己出。不幸子輝亦早世。二孫犖犖。字而教之。咸有成立。嘗自謂曰。吾仰事俯育。庶幾心無媿怍矣。晚歲忽慨然曰。人生幾兩屐耳。徒碌碌何爲。乃悉以家業付其孫。優游終身焉。其卒也。鄉里之人咸嗟悼曰。翁君厚德之君子也。而今亡矣乎。君元配陳氏。生子一人。卽輝也。繼室章氏。生女一人。適應洪膺。孫男二人。長卽璽。次琳。曾孫男四人。玄孫男七人。銘曰。

鄭府君墓銘

猶歟翁君。自躬蘊德。自其先世。有累有積。積久必發。鍾于君躬。謂宜奮揚。遂臻顯融。君則退然。務有諸己。實斂實藏。弗耀弗侈。彼名是競。我守以謙。彼利是攘。我取以廉。居之休休。己德己有。餘澤所被。垂裕爾後。焯幽發隱。播其遺芳。後欲知君。視此石章。

歟有隱君子曰鄭府君。旣歿之十有八年。其子德裕始奉執友唐君桂芳所爲狀。以銘來請。德裕之言曰。先君子德有以成己。而壽不及艾也。才足以用世。而名不及顯也。惟是葬且久而墓上之石猶無文以刻。

先猷遺懿。將無以暴于後世。不肖孤之罪。其何以辭。今幸獲交於執事。不朽之託。竊願有請也。余惟自昔。君子負其所有。生不克表。著于世。死因泯泯。而無傳者衆矣。今德裕獨能圖其親于不朽。其可謂孝矣。迺閱狀。迹其所列。與德裕言合。且唐君其鄉先生也。爲言尤可徵。則爲按狀序而繫之銘。府君諱以文。字彥章。鄭氏。世爲徽之歙縣人。曾祖南鳳。宋迪功郎江東提刑司幹辦公事。祖申道。宣教郎。父昭祖。元奉訓大夫江淮等處財賦都總管府副總管。奉訓公先娶許氏。生二子。長曰淵。承事郎。平江等處財賦提舉。次曰深。再娶羅氏。宋朝列大夫龍圖閣直學士吏部尙書汝楫之六世孫。奉直大夫新安通守鼎之女。生子二人。長卽府君也。府君生而凝重。狀貌偉然。甫七歲。氣象如老成人。讀書過目卽通大義。爲詩歌。語出人意表。奉訓公愛之甚。延名師訓教之。常曰。此真吾子矣。不幸奉訓公遽捐館。承事君方遊京師。縱萬金以結客。久留備宿衛。而深又早世。於是府君獨奉羅夫人理家政。內外井井有條。遇事應物。隨其鉅細。急緩處之。若絲理櫛。比不少紊。年饑。減穀價三之一以賑貧乏。鄉閭宗族。稱其厚德。無閒言。而產業視舊日益加。承事君之家食也。治園池。構亭榭。日與賓客壺觴絲竹以爲娛。府君左右承順。得其歡心。而羅夫人春秋高。且寢疾久。府君奉湯藥。惟謹。夜則稽顙北辰。願減己年。以益母壽。及居喪。哀毀骨立。人有所不堪。撫承事君之子。咸有成立。女各得所歸。其孝友純篤。有如此。府君識度明朗。氣和而行夷。雅不嗜仕進。而樂從賢士大夫游。與之游者。咸服其德器。自以不及也。至正癸未。郡府列其行義。上于行中書。南行臺楊公衍

飭曹公復亨皆名御史也。復剡薦之。當得官。不報。壬辰之夏。大盜及其境。以物色求之。將強之出。府君憂憤疽發于背而卒。十二月某日也。享年四十有九。元配程氏。浙東宣慰副使相之女。繼室吳氏。子男二人。長卽德裕。次德堅。女三人。適汪誠。程幅。戴堽。葬以甲辰十二月某日也。在寧泰鄉小于山之原。銘曰。有豐以殖之。孰奪而嗇之。有振而擇之。孰闕而抑之。吁嗟乎。維命實職之。施之獲之。子孫其食之。我銘以勸之。過者式之。

蔣季高墓誌銘

嗚呼。惟是季高之墓。季高諱允升。蔣姓。東陽人。年二十有九以卒。至正十七年七月甲戌。其卒之年月日也。葬以明年某月日。墓在乘聽鄉御史里華樹塢之原。初。禕與季高同從翰林侍講學士黃公游。季高之卒。公甚哀之。將爲銘其葬。俄而亦遽捐館。遺命以屬之禕。嗚呼。禕尙忍銘吾季高耶。雖然。季高之交于禕也厚。矧以公嘗有命。師友之誼。於是爲之銘。非禕誰實宜爲。季高之先。自漢函亭侯澄。由京兆徙義興。又七世爲晉吳郡太守樞。復徙臨海。又十七世爲唐吏部員外郎。則則之子勳。爲吳越檢校司空。兼御史大夫。乃徙東陽。又十七世孫入國朝。南康路建昌縣主簿沐。季高之曾大父也。大父吉。襄陽路穀城縣尉。父元。私諡貞節先生。母葛氏。季高幼穎異。讀書過目卽成誦。見稱奇童。稍長。益自力于學。貞節君性嚴毅。教訓甚篤。延太末方先生麒。同邑李先生亦于家塾。俾季高禮而師之。貞節君與兩先生皆金華文懿許公。

弟子其學承朱子之正傳。凡天人性命之奧。禮樂名物度數之詳。季高悉得于耳提面命。而會其指歸。年甫弱冠。所學已粹然一出于正矣。及貞節君與兩先生繼歿。季高乃束書入懷師山中。博考而精思之。所有既富。發爲文章。動合法度。而時時喜自馳騁。有古作者風。會黃公致政家居。季高爰登其門。公一代文章宗工。少所許可。每見季高所述作。未嘗不稱賞。以爲得之之晚也。季高爲人。恂恂然樂易。不自銜鬻。而駭論風集。度越人表。動靜出處。嘗擇義而舉。事母孝。相其三兄。植門戶。振鄉閭。周嫗族。備極恭順。以故道季高之善者。內外遠邇無閒言。季高嘗試有司不合。遂棄其業不爲。部使者舉其茂材。當得官。未報而季高死矣。學士大夫以謂季高之于學。行進而未止。將必遠大。其材有成。而志有所就。孰謂不幸而輒死也。故其死也。議與不識。凡知其人者。皆爲之悲。而學士大夫于此。尤歎夫天者之難必也。嗚呼。季高之不得壽考。以盡其材。以究其志。豈不有命在天。而命之至于如此。何也。抑天之于君子。降年不永者。亦可勝數。而君子之所以名世。則在此而不在彼。嗚呼。有如季高者。因其實而論其名。其亦足以不朽矣夫。季高娶陳氏。子男三人。旭。奕。時。皆幼。所著有時敏齋稿若干卷。將葬。其伯兄允同。復以外甥楊芾所爲狀來速銘。銘曰。

命之愆。弗永年。名之晰。可長世。固茲藏。無壞傷。勒貞碣。示來葉。

故成齋王先生墓表

先生諱城字玉成。姓王氏。學者不全稱其字。而用成齋爲先生稱者。尊之之辭也。王氏系出太原。五代時有爲節度使曰彥超者。來居婺義烏之鳳林鄉。至宋。自鳳林徙居郡城者。曰三府君。五世而生本。贈太師。追封魯國公。本生登政和二年進士。知湘陰縣。贈太師。追封魏國公。登生四子。師醇、鄉貢進士。贈奉議郎。師心、政和八年進士。累遷給事中。兼侍讀。權吏部尙書。除顯榮閣直學士。知紹興府。充兩浙東路安撫使。爵東陽郡開國侯。贈特進。諡莊敏。師古、亦鄉貢進士。師德、宣義郎。贈太師。追封楚國公。莊敏次子浣。知桂陽軍。贈正奉大夫。是爲先生之曾祖。而楚國長子淮。紹興十五年進士。淳熙中。致位左丞相。封魯國公。贈太師。諡文定。則先生曾叔祖也。祖諱槐。由大理寺丞知汀州。終朝請大夫。父諱侑。將仕郎。監南康北院。先生幼穎悟。資稟溫厚。雅不樂華靡事。唯篤志問學。不少懈。初先生從高叔祖直煥。章閣兩浙西路提點刑獄師愈。嘗從鄉先生徽猷。閑待制潘公良貴。及龜山先生楊公時。中書舍人呂公居仁游。其子爲主管建昌仙都觀。瀚受業東萊呂成公之門。其孫爲魯齋先生文憲公柏。傳道於鄉先生北山何文定公基。何公得於勉齋黃文肅公榦。黃公即考亭朱子門人也。先生於文憲爲諸孫。又在弟子列。未嘗輒去左右。而丞相之孫直敷。文閣福建轉運副使敬巖先生倬。其學得于攜堂劉公炎。雙峯饒公魯。皆本于朱子。復與文憲公諸父子姓一門自爲師友。先生於敷文爲從子。故又得以朝夕承教而無閒。討論經義。講說理趣。微辭奧旨。聞見日深。其家學之淵源。與他人號稱師弟子者不侔矣。先生之學。旣粹然一出于正。而固未嘗

標榜以立異。矜持以爲高。同時若葉公闡者。丞相衡之孫。何公欽者。文定之子。皆與先生以風流文雅相尙。爲忘年交。先生素無仕進意。或勉之曰。世祿不可墜也。乃赴銓試。中其首選。補修職郎。監建康酒稅院。未及上而運去物改。因不復出。棲遲先廬。遂爲終焉計矣。久之。遺民故老。日就淪謝。先生與剡源戴公表元。永康胡公長孺。浦陽方公鳳。粵人謝公翺。皆以節操相激厲。時唱和于殘山剩水。風月寂寥之鄉。黍離麥秀之音。往往而見。讀之令人有慨然之思焉。於是浙東宣慰按察二司。並治於婺。握帥符持憲節而來者。與其僚佐。悉領夫鉅人。若恆山周公鏊。隴西李公思衍。洛陽陳公元禮。河東臧公夢解。曹南完顏公貞。漁陽鮮于公樞。郡守倅若高平孟公淳。錢唐夏公若水。剡邱李公衍。無不略勢分內。交于先生。造先生之廬。無虛日。或咨扣義理。或商確詞翰。或講求典故之沿革。或訪問政務之得失。先生歷歷與之言。莫不厭服。以謂前代文獻之遺。惟先生足徵而已。先生丰采明朗。儀渠淹習。而冠帶偉然。望而知其爲喬木故家之君子也。娶爲呂成公過化之地。後人因立祠事。宣憲二司。欲招徠學者。講肄祠下。圖屈致先生爲之師。而先生不欲以師道自任。則薦仁山金先生履祥。且以書勉之出。仁山。文憲門人也。時方高臥蘭江上。因先生言。不得已爲起。文憲之道。繇以大明。故凡學者。猶以事仁山者事先生焉。先生生于宋淳祐丁未十二月十七日。卒于今泰定元年四月二十一日。享年七十有八。以卒之年十一月日。葬于金華縣東安期里黃枇塢之原。去魏國兆域若干步。所著詩文若干卷。手鈔若干卷。娶永嘉趙氏。二子。長邵孫。次雲龍。將

仕郎江山縣尹致仕孫男四人。閑、閏、闐、闐。並以文學世其家。嗚呼。宋南渡後。以及于今。娶之衣冠家。莫盛於王氏矣。爵祿道德。聯蟬奕葉。而先生有以承其先子孫賢才。是似是續。而先生有以垂其後。徵諸其身。不亦盛德之君子乎。嗚呼。雖無老成人。尙有典刑。自先生歿。而百年之老成典刑盡矣。然其所以不朽者。久猶未有登載。遺風餘範。將遂湮微。是用追述其梗概。揭于墓道。庶幾來者有所鑒觀焉。

喻母石夫人墓表

義烏喻氏有賢母曰石夫人。諱端靜。字可度。石姓也。石爲浦江望族。祖諱範。通州泉州南外大宗正丞。父某。母某氏。夫人生于宋開禧三年丁卯六月四日。以有元至元二十五年戊子九月二十五日卒。享年八十有二。後四年辛卯某月日。葬崇德鄉蓮塘山之西原。又六十有四年。其曾孫密始謀追列遺懿。揭于茲表。密之言曰。我曾祖母夫人之幼也。莊重而敏慧。凡女工之事。咸精其能。好讀書史。通古今大略。宗正府君甚愛之。擇所宜歸。以歸于我喻氏。爲曾大父登仕郎諱夢炎之配。我曾大父本朝奉郎簽書鎮南軍節度推官諱偏之孫。諱宣子之子。我五世祖承直郎縉雲縣丞諱南強。于朝奉府君爲從弟。命以爲孫焉。于是夫人逮事祖姑朱氏。朱持家甚嚴有法。夫人佐其奉祭祀。待賓客。能每自得其歡心。有疾。躬侍粥藥。衣不解帶者數月。朱歿。夫人繼專家政。一遵其舊。故曾大父得不以米鹽細故爲累。刻意問學。用周禮。領漕薦於江東。初我高祖諱厚祖早歿。曾大父旣爲之後。而高叔祖諱潤祖於凡田產。輒倍取爲己有。夫人語

曾大父曰。爭之則不足。讓之則有餘。君幸無較焉。曾大父泫然泣曰。爾之言。我之志也。卒無閒言。夫人外姊宋氏。自幼與夫人同育。宋適侍郎朱公質之子。家既盛。且有廕。而無所出。求子于夫人。以爲繼。夫人固辭曰。繼嗣命同宗。禮也。今取之他姓。不其起爭端乎。朱公聞而歎曰。秉節貞潔。而識見明達。真賢母哉。我曾大父既蚤喪。夫人孀居四十年。篤于教子。延名師訓之。而親以曹大家女誡教其女。每舉古人名言善行。以勉人。讀史見奸邪逆亂。輒廢書而歎。及忠義節孝。則嘖嘖歆羨不已。月旦望。列子婦堂下。命誦柳仲塗家訓。使之聞。我先祖兄弟。用能以孝弟稱。夫人年既老。而動循禮度。若女婦然。視其色。不知其喜慍。雖處豐厚。而自奉極儉約。常躬紡績不廢。先祖每進曰。家幸給足。何自苦爲。夫人曰。婦人之事。女工猶男子之事。學業寧可因貧富爲勤怠乎。性好施予。務周人乏絕。遭歲歉。傾廩以賑糶。鄰佃有逋負。聚其券焚之。而雅不求福田利益也。凡此皆夫人之懿行。我先祖常舉以語。語及未嘗不流涕也。密謹志之。不敢忘。子其爲我書之。以昭示于永久。禱聞。自昔風化之美。皆本于內治。而陰教行于閨門。家之所以齊也。維夫人五世祖姑黃令人。事姑孝。承其夫以敬。御諸子若孫。既慈且嚴。家貧。至露服飾爲資。延儒先以教子。其子工部郎官良能兄弟。聯登科第。悉爲名士。故義烏之賢母。稱喻氏矣。嗚呼。夫人所謂善於繼承者耶。其貞則嘉模。誠足以軌世範俗。易之黃裳元吉。詩之警戒相成。庶幾兼之。是不宜無所表見。庸述密之言。序次如右。夫人三子。長曰京。登仕郎。次曰魏。早夭。次曰高。卽密之祖也。女五人。長適朝請大夫通判廬州李

石次與四俱天。次適將仕郎朱程。次適國學諭吳鏞。孫男三人。長曰祺。爲諸父鑑。後次曰祐。祐則密之父也。女一人。適童祐。曾孫男四人。長卽密。次宣。次安。次寓。女四人。玄孫男一人。濬。女三。而濬則密之子云。

凝熙先生聞人公墓表

凝熙先生。姓聞人氏。諱夢吉。字應之。婺之金華人也。凝熙者。門人之所以諡先生。謂先生爲德精醇而弗變。含和而有耀。以凝熙易名。爲稱情也。然先生非隱者也。嘗仕于時。有官位矣。不見爲先生稱。而稱以私諡者。先生之德。不因官以爲重。故不稱其官而稱其德也。維聞人氏。系出漢太子舍人通。後居于蜀。宋季有諱紹者。爲金華縣令。因家焉。子孫遂爲其縣人。縣令生逸孫。元初爲溫州路儒學教授。教授生說老。仍世業儒。號桂山翁。翁生三歲而孤。母王再適項氏。翁鞠於項氏。因從其姓。娶劉侍郎諸孫女。實生先生。乃以先生還氏。聞人云。先生幼有異質。學知嚮方。鄉先達定庵王公某。與其口魯齋文憲公柏。崇尚伊洛之學。以承朱子之傳。翁皆及其門。而所學得之定庵爲多。于是以其所得者以教先生。父子自爲師友。夙夜磨切。所資日深。先生於七經傳疏。悉手鈔成帙。義理所在。必深究而密察。雖其微隱。剖析靡遺。凡訓詁家之說。有紛拏牴牾者。皆爲別白是非。使歸于一。閉戶討論。逾十年不出郊。一日有約游城南者。取所藏革履御之。履久弗御。底腐且穿矣。久之。乃開門講授。四方學者咸來受業。婺爲憲府所治。司憲者每禮致先生。坐郡庠。爲學者師。及歷仕教官。所至學者爭從之游。先生設教。先道德而後文藝。有以經傳疑義爲問。

辨者必爲敷陳衆議而以己說折衷之使其領解乃已。前後學徒亡慮二千人。隨其資而裁補之。多爲成材。先生信道甚篤。持己應物一本於誠。涵養既馴。內外一致。長身山立而退然不勝衣。氣貌沖粹。如元文之玉。溫潤無瑕。而孚尹煥然。平居未嘗有惰容。雖祁寒盛暑。常正襟危坐。淵然若有思。令人望之起敬。卽之愛慕。不能舍以去。蓋識與不識莫不稱爲有德之君子者也。泰定丙寅。先生舉進士于鄉。上禮部不合。繼復連中鄉貢副榜。用薦者爲校官。歷處州學錄。衢州西安縣學教諭。昌國州學正。以累考及格。授泉州學教授。至正戊戌。朝廷遣治書侍御史李君國鳳經略江南。得承制封拜。君嘗從先生游。知位不稱其德。除福建等處儒學副提舉。而吏部亦以先生年勞當陞。調慶元總管府知事。皆不上。壬寅三月某日。卒于永康之寓舍。享年七十。以其年八月某日。葬于某鄉某山之原。夫人胡氏。無子。以弟之子復亨後。女二人。長適唐壽道。次適胡裕。夫人之姪也。先生之歿。門人前翰林編修宋濂。原道書院山長吳履。仁和縣丞唐元嘉等。旣相與謀私爲先生諡。又告郡太守祠之學宮。而濂復述其行以爲狀。今國子學錄張丁。嘗集先生遺文爲六卷。且以狀授禱曰。子吾郡人。知先生爲詳。冢上之石。宜有刻文。以惟子也。屬先生禱執友也。誼不敢辭。乃論次如右。而復爲之言曰。嗚呼。聖賢之學。先生之所爲學也。觀其立誠以致乎本。推善以及于人。表裏融通。始終純一。稱爲有道之君子。夫何愧焉。嗚呼。先生爲足以不朽矣。揭其徽猷。著于貞石。後之來者。尙有考于斯。

漳州路達魯花赤合魯溫侯墓表

元有盡節之臣曰漳州路達魯花赤諱迭理彌實字子初合魯溫氏西域人也洪武元年王師征閩閩八州不兩月而平當是時合魯溫侯實監漳郡於是守將旣以所部軍先遁郡事又屬他官總制政不自己出欲圖守禦之策計未決而總制者已納降俄報新朝使者至禮當郊迎侯從容語左右曰吾將圖之乃朝服北面再拜曰臣四十始仕不數年致位二千石國恩厚矣今力不能禦敵義不忍降報國恩者唯有死耳遂斫其印篆書其笏曰大元臣子置案上卽引佩刀刺喉中絕咽以死旣死手執刀按膝坐毅然如生時郡民聚哭庭下聲震地共斂葬城東門年蓋四十有六矣侯早歲備宿衛用年勞當入仕以母老不忍去膝下不願仕母歿服除東宮素知其才力勉之乃仕授承直郎行宣政院崇教至正辛丑陞奉訓大夫杭州路治中尋改福州壬寅以事至京除福建行省理問官階轉奉議與福建行省平章燕只普化同赴任會盜據閩城不得入侯贊平章集諸縣民爲兵急圍城盜勢旣蹙乃開城東門使出奔因勒兵殲之以功陞朝列大夫居三年除漳州路達魯花赤階亞中大夫時陳有定據全閩民苦其朘剝侯曰吾受千里生人之寄寧忍坐視弗加恤乎頗釐庶事之利病與除之敏於吏事而務存忠厚民受其惠甚多故其死也漳人無不痛思之其爲人可稱道者如此侯祖曰滿速兒大都路治中父曰默里馬合麻安慶路治中夫人回回氏子男二人長六十宿衛爲速古兒赤次晉顏帖木爾江西行省通事嗚呼世之論者蓋曰

非死之難。而處死之爲難。侯職在守土。義不事二姓。而守其土以死。可謂死得其所矣。豈非盡節之臣歟。余至漳州。得侯死事爲悉。因歎八州之吏。大小奚翅數千百。而大節烈然如侯者。殆不可一二數。故爲書而表之。而并及其官閥世次。使刻諸石。豈特以慰漳人之思。庶用爲人臣之勸云。

時齋先生俞公墓表

元既有江南。以豪侈粗戾。變禮文之俗。未數十年。薰漬狃狎。胥化成風。而宋之遺俗。銷滅盡矣。爲士者。辨髮短衣。效其語言容飾。以自附于上。冀速獲仕進。否則訕笑以爲鄙怯。非確然自信者。鮮不爲之變。是時金華俞先生。獨率其家以禮。深衣義冠。談說古道。客造門。肅威儀。俯首拱而趨以迓。至門。左右立三揖。至階。揖如初。乃升及位。又揖者三。每揖皆有辭。相稱慰慶贊。周旋俯仰。辭氣甚恭。鄉人小子。去宋久。不知宋俗皆然。或竊指先生爲異。或尤以爲迂緩。先生不顧也。年七十有二。卒于元至治四年正月十七日。先生既亡。而宋之遺俗。無有知者矣。先生諱金字叔器。別號時齋。其先杭州吳越錢氏時。有仕其國爲戶部尙書兼營田使者。曰公帛。嘗道娶義烏。愛其地。遂遷邑之鳳林鄉。戶部生德銓。德銓生諫。又徙金華之孝順鎮。諫生海。海生善轉。善智。各有子四人。皆爲儒。惟善智子昌言。宋大觀三年上舍釋褐進士。知永豐。蕭山二縣。而善轉子奉。復家溪南之羣山。奉生某。縣主簿。允中。允中生性。性生咨益。咨益生壽。壽生義。先生父也。母金氏。先生少好學。善自程督。鉤發窺索。水涵木滋。月長歲化。壯而有名。一試不合。有司卽退修于家。

於經史尤潛心搜訂。較辯疑昧。多所附益。學者師尊之。受業者繼于門。先生年愈加。志愈篤。爲學晚而彌成。人望其致於用。而宋亡矣。故先生之名。不大顯于世。惟發之文章。以自見。久而亦散軼不傳。世由是無從知先生。知而言之者。鄉人而已。然先生所存。鄉人未必知之。知其詳者。惟子暨孫。至曾孫則已疎矣。使更越數世。復有知者乎。篤於自信者。固不卹乎人之知否。然德如先生而弗傳。則天下之爲善者寡矣。禮是以論列之。以見不苟合乎一時者。乃所以合乎後世也。先生娶王氏。生四子。曰祿。祺。祐。祉。而卒。諸子以卒之歲。十二月甲辰。葬于就日鄉義和里之楊家園。今去先生卒時四十有六年。而先生之孫有欽。有奇。有識。有觀。有慶。有用。有元。多爲老成人。曾孫五人。亦已長云。

烈婦李夫人墓表

嗚呼。是爲烈婦李夫人之墓。夫人。夏氏。諱婉常。宋英國文莊公之裔孫。九江人也。年二十。爲南昌李氏婦。又十四年。當元至正戊戌。歲四月十六日。陳友諒陷南昌。夫人死之。頃予承詔修元史。有司以夫人死事來上。亦旣書其大節。列于史冊。微名峻範。可不朽矣。會其夫宗頤。官王朝爲國子學正。與予善。復請論次其言之詳。表于墓道。予不敢以不文爲辭。李氏江西令族也。在宋世。擢名科。躋法從者。凡數輩。而宗頤字克正。自少有才譽。能振其家聲。夫人之父。權茶副使。德懋。愛夫人。故以妻宗頤。夫人生六歲而母歿。能以禮自防。女工旣精。又讀書通大義。旣歸李氏。逮事其姑。左右承順。得其歡心。姑嘗有疾。朝夕奉湯藥。衣

不解帶者累月。以孝聞。平居治家有法。相其夫。祀祖宗。款賓客。舉無違禮。資性剛慧。而處事遇物。一用柔巽。族嫗之間。號能盡婦道者。必稱夫人焉。及友諒之衆來攻城。夫人度旦夕城且破。謂其夫曰。禍迫矣。吾夫妻子母。萬一不相保。唯當索我井中耳。俄而城陷。夫人與其夫若子皆相失。獨攜二女。匿後園叢竹中。寇直其所在。欲驅以去。夫人探懷中金珠擲之曰。我不行。以此遺爾。不然。卽殺我。寇得金珠輒去。而繼至者相屬。度終不可免。乃擁二女投井中。井水淺不得死。而水旁有甃石橫出可立。乃挾二女立石上。有頃。婢從井上呼。夫人問夫與子安在。婢以訛聞對曰。俱亡矣。夫人大哭。謂二女曰。我意汝父在。故忍死在此。今汝父旣亡。我不死何待。又哭曰。天乎。李氏何辜。禍胡若是酷邪。然吾幸身不污。庶無玷。李氏可與我夫相見地下矣。且以後事囑其女。言甚悉。卽更自投水。次女繼之。旣而其夫至。救長女得無恙。而夫人與次女皆死矣。夫人時年三十四。次女甫十歲。明年己亥十一月五日。祔葬新建縣西嶺鎮梅岡先塋之側。長女曰貞蘭。適舒景南。子曰樾。今爲國子學生。嗚呼。死之於人大矣。惟義是蹈。而視死如歸。雖君子猶難之。况女婦乎。若李夫人之死。就義無難如此。稱之曰烈婦。曷有媿乎。夫褒德錄美。以示世勸者。史氏之責也。予是用重書其事。以寓夫善善之意。春秋之法。具文以見意。故亦不復爲之辭。

